

# In liug per la memoria culturala

Igl archiv cultural dalla vischnaunca da Sumvitg ella casa da scola a Surrein pren conturas

DA HANS HUONDER / ANR

■ **L'entschatta da quest onn ei l'Uniun archiv cultural Sumvitg vegnida fundada. Commembras e commembers ein semess ladinamein alla lavur. Ils fretgs da quei engaschament ein gia bein veiseivels ell'emprema alzada dalla casa da scola a Surrein. Ils regals semtgai per cudischs, protocols vegls, fotos ni era portatuns s'empleinan plaun a plaun.** Cun la fundaziun dall'uniun igl unviern vargau han ils iniziants da quei archiv – *Walter Deplazes* da Surrein e *Tarcisi Hendry* da Sedrun – dau il siet da partenza d'in project en favur dalla cultura e la historia locala. Lur fiug ha beinspert era tschaffau outra gliued. L'uniun dumbrava gia rodund 100 commembras e commembers. La stanza en casa da scola a Surrein che vegn messa a disposiziun persunter dalla vischnaunca ei vegnida endrizzada cun l'infrastructura necessaria per arcunar documents vegls da muntada che duein vegnir salvai dalla dismessa. Ils 50 000 francs mess a disposiziun dalla vischnaunca per quei intent ein secapescha stai beinvegni. Cun in flyer a tuttas vischinas e tuts vischins ha l'uniun derasau l'entschatta settember sias ideas e sias finamiras ed aschia animau in e scadin – era personas da Sumvitg ch'habiteschan oz ordeifer la vischnaunca – da partertgar vid igl archiv cultural quei mument ch'ei ha num sedistaccar d'enzatgei vegl ed interessant ch'ei da muntada culturala e historica.

## Dagot e dagot dat puoz

Ils appels persunals ed a scret che l'uniun ha fatg portan fretg in tec alla ga. «Il davos temps havein nus adina puspei survegniu documents, oravontut cudischs», di Hendry che ha gia realisau igl archiv cultural a Tujetsch e ch'ei leu era archivar communal. Il material che vegn surdaus agl archiv a Surrein vegn examinaus e catalogisau. Fotografias e maletgs vegnan digitalisai. Ina plattafuorma digitala en fuorma d'ina homepage duei lu dar pli tard in access online agl archiv. «Sch'ina persuna surdat a nus siu relasch



**Il president dall'Uniun archiv cultural Sumvitg Walter Deplazes (sen.) ensemen cun Tarcisi Hendry ch'ei medemamein commember dalla suprastanza e che s'engascha cun tgierp ed olma pigl archiv en casa da scola a Surrein.**

FOTO H. HUONDER

ni ina part da quel e pretenda ch'ils documents seigien buca ni pér pli tard veiseivels per la publicitad, acceptein nus secapescha quei. Lu vegn il material archivaus aschia che negin sa prender investa dad el», di Hendry che sesa era ella suprastanza dall'uniun e che conta dil reminent el Chor mischedau Surrein. El constatescha ch'in ni l'auter ha miserias da sedistaccar digl uorden vegl: «Quei ei nuot auter che normal. Sche la gliued sa denton che lur documents ni per exempel albums da fotos vegnan conservai bein ed han aschia era muntada per la cultura sch'ei quei secapescha motivont per biars.» La finamira digl archiv cultural ei da procurar che rauba veglia da muntada culturala e historica vegni buca semplamein dismessa, mobein salvada pigl avegnir. Il mument ei l'uniun engaschada oravontut cun endrizzar igl

archiv, mo era sortir oravontut cudischs ch'ei vegni surdai agl archiv. Hendry quenta ch'ei seigi gia entuorn 2500 exemplars. Igl archiv sco tal duei vegnir partius en differents secturs, denter auter cun differenziar las scartiras en lur idioms romontschs ni era pertuocent impurtonza locala ni regiunala. Tenor Deplazes fascineschan l'idea e la lavur egl archiv buca mo personas sils onns, sco quei ch'ins pudess manegiar: «Igl ei era giuvens che han grond interess da quei project.»

## Bia da far

Sper l'idea da rimnar documents da pli baul vulan ils responsabels digl archiv era extender lur engaschament enten consultar per exempel archivs communalis ni eventualmein era dalla pleiv. «Leu dat ei segiramein era documents ch'ei d'im-

purtonza per nus», di Deplazes. Lu duei l'uniun denton era collaborar cun auters archivs culturals, surtut ella regiun. En quei connex settracta ei buca mo d'in eventual scomi da documents per exempel dubels, mobein era d'arranschaments ni in brat d'experientschas. Ina damonda che fatschenta l'Uniun archiv cultural Sumvitg ei il mument il sistem da registraziun. Cun exposiziuns specialas davart singuls temas vul igl archiv alura sefar attractivs egl avegnir. Pusseivladads dat ei en quei connex avunda, seigi cun cudischs d'ina tematica particulara ni per exempel fotografias ni films da pli baul. La filosofia dall'uniun ei clara. «Mintgin che ha interess duei separicipar a noss'uniun ni semplamein nezegiar igl archiv ch'ei en quei senn gie publics», di Deplazes. Sco tut igl auter drova ei denton era cheu in svilup.